

Shtar dives o horos vodinelas pes katar e zhuvlya, ama ko panchto dives, ando enyato may, e zhuvlikane horya achhyovenas thay astarenas pes e mursha te khelen. Kana khelenas e mursha, e zhuvlya na ulo len pravo te astaren pes ko horos. A o murshikano horos ulo but lachho. Isineyas les ekh shero kay vodinelas les thay ov so phenelas, davka kerelas pes. Isineyas ekh rom ki pori. Ov napravlinelas – isine les vazhno funktsiya. E bashalne dikhenas sar zhala o horos thay chokka bashalenas. Naprimer, astarenas te prasten, togava o tauli marelas ekhe thanes. Pala astarenas te khelen klekimasa, ushtimasa thay plyaskomasa. Pala prastenas pal ko tauleskoro mariba thay o horos tradelas pes upral stavende – togava i muzika si aver. Pala astarena te khelen prastamasa ko mashkaripe. Pala o horos zhalas podskachimasa. Ulo but interesno. E mursha sine e roma, kay bichhalenas o Gergyovden te zhal peske.

I akana, avelas o Gergyovden – rom kale grasteste, parne sheyantsa. Akana ov ulo veki kale grasteste. Avelas dural, izupral thay astarelas te kerel alai ko mashkaripe. Pala anglal e mursha, palal li e romnya astarenas pest e khelen posledno horos. E mursha khelenas ko maskaripe, a ame e romnya – rigatar. Ando Gergyovden li e zhuvlya, li e mursha ule ekhe thanes – gilyantsa, khelaipnasa, bashalipnasa. Chalavasas amen ando chekata (savka ulo amaro obichai) thay vakerasas: “Ayde, Gergyovden gelo peske! Ayde, Gergyovden gelo peske!”. Ili: “Kavka bersh gelo peske, zhi bershe pal aka avel!”.

